

Newspaper	Berita Harian
Date	7 October 2015



Najib bersama Nor Mohamed melancarkan Buku Khazanah Megatrends Forum 2015 'Reflection On a decade' sambil diperhatikan Abdul Wahid (dua dari 'kiri) dan Azman di ibu negara, semalam.

[FOTO ASYRAF HAMZAH/BH]

Syor gabung agensi teknologi, inovasi

» Gabungan elak bertindih tugas, kurangkan kerenah birokrasi

Oleh Mohd Hamizar Hamid dan Shahrizan Salian
bhnews@bh.com.my

► Kuala Lumpur

Kerajaan bercadang menggabungkan semua agensi dan badan kerajaan yang terbabit dengan teknologi dan inovasi bagi mengelakkan pertindihan tugas, kata Datuk Seri Najib Razak. Perdana Menteri berkata,

ketika ini ada lima agensi di bawah Jabatan Perdana Menteri, tiga kementerian berkaitan teknologi, enam kementerian dengan persatuan teknologi, tiga pengawal selia, empat pertubuhan dipengeruskannya dan empat pertubuhan lain.

Selain itu, katanya, ada empat lagi perbadanan, tiga perbadanan yang mempunyai dana, tujuh agensi pembangunan dan perbadanan, satu yayasan, enam institut penyelidikan, tiga persatuan industri, dana amanah dan dana terurus dengan masing-masing mempunyai lima serta 11 agensi pembiayaan.

"Jumlah ini banyak. Dengan jumlah entiti yang banyak ini, wujud risiko ruang perpeca-

han dan menjadi cabaran yang perlu dihadapi kerajaan.

Kerenah birokrasi

"Kita perlu mengenal pasti jumlah agensi dalam kerajaan bagi menentukan yang benar-benar penting, sekali gus mengurangkan kerenah birokrasi.

"Kita juga perlu kepada penjurusan bagi mengelak pertindihan tugas. Justeru, penggabungan perlu dilaksanakan supaya tugas dapat dilaksanakan dengan lebih lancar dan efektif," katanya ketika berucap merasmikan penutupan Forum Khazanah Megatrends 2015 di sini, semalam.

Yang turut hadir, Menteri di Jabatan Perdana Menteri, Datuk Seri Abdul Wahid Omar,

Timbalan Pengerusi Khazanah Nasional Berhad, Tan Sri Nor Mohamed Yakcop dan Pengarah Urusannya, Tan Sri Azman Mokhtar.

Dalam ucapan sama, Perdana Menteri turut menekankan kepentingan sistem pendidikan bagi masa depan ekonomi negara, terutama bahasa Inggeris.

Penekanan bahasa Inggeris

Beliau berkata, selain penekanan subjek Sains, Teknologi, Kejuruteraan dan Matematik (STEM) dan bahasa Inggeris, kerajaan berhasrat melahirkan lebih ramai generasi berbakat pada masa depan.

"Inilah masanya untuk kita melakukannya dengan lebih baik lagi. Sebagai cabaran, kita berhasrat untuk terus berkembang ke dalam sektor inovasi dan pengetahuan ekonomi," katanya.

Sementara itu, Ketua Kluster Industri dan Inovasi Majlis Profesor Negara (MPN), Prof Dr Mohamad Kamal Harun, menyifatkan cadangan penggabungan adalah bertepatan dengan aspirasi melahirkan lebih ramai penyelidik dan pereka.

Katanya, kerenah birokrasi juga berupaya merencatkan daya inovasi dan penyelidikan di institusi pengajian tinggi.

"Kita bimbang apabila terlalu banyak agensi mengendalikan proses permohonan, daya inovasi dan teknologi di negara ini akan terbantut.

"Penyusunan semula mengikut fungsi masing-masing adalah cadangan bernas, selaras usaha mengoptimumkan pengurusan dan kelancaran proses teknologi serta inovasi," katanya kepada BH, semalam.

Perdana Menteri juga dijangka menyentuh penyusunan semula agensi membabitkan teknologi dan inovasi ketika membentangkan Bajet 2016 pada 23 Oktober ini.